



21. august 2009

UKA 2009/65

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Kalaallit Nunatsinni atornerluisunut katsorsaannermut ilinniarfimmik pilersitsisoqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

Tunngavilersuut:

Atornerluisuunerup ajornartorsiutai taakkulu inuiaqatigiinni kalaallini sunniutai pillugit samminninneq piffissami matumani aatsaat taamak annertutigivoq. ATASSUT-mit naliliinerput naapertorlugu oqallisigissallugit tunuarsimaarfigineqartarsimasut taamak ammatigisumik oqallisigineqalernerat ajunngitsuullunilu toqqissisimanartuuvoq aammali inuttut ataasiakkaatut inuiaqatigiittullu iliuuseqarnissamik piumasaqaatitaqarluni.

Inuiaqatigiit kalaallit unammisassanut aatsaat taamak annetutigisunut sassartussanngorpugut, namminersorneq eqqunneqaleraluttuarpoq, aningaasarsiornikkut namminiilerusuppugut, innuttaasut ilinniarsimassutsikkut qaffassarneqarnerat ingerlanneqarpoq, inuiaqatigiittullu nunarsuarmioqataanerput annertusarniarlugu suliniuteqarpugut, tamakku tamarmik pipput naak massa innuttaqassuseq eqqarsaatigalugu inuiaqatigiit mikisunnguugaluartugut.

Inuiattut nutarterinerput iluatsilluassappat, aammalu unammisassat takkuttuartut iluatsittumik ingerlanneqarsinnaassappata inuttut ataasiakkaatut aammalu ataatsimoortutut piareersarluarsimallutalu nukissaqarluarnissarput pisariaqarpoq.

Qujanartumik nunatsinni innuttaasut amerlanersai nammineq soqutigisat aammalu inuiaqatigiit soqutigisaat aallutissallugit nukissaqarluarput, taamaattorli aamma piviusuuvoq innuttaasut amerlasuut immikkut tapersersorneqarnissamik aammalu katsorsarneqarnissamik pisariaqartitsisuummata.

Taakku kingulliit tassarpiaapput immikkut sammineqarlutillu iliuuseqarfigineqarnissaannik ATASSUT-mit siunnersuutitsinni matumani ujartuinitinnut pissutaasut, tassami ajornartorsiutit artorsaatillu oqaluuserissallugit tunuarsimaarfigineqartarsimagaluartut ammasumik oqaluuserineqartalernerisa malitsigisaanik aamma ersersinneqaleriartuinnarpoq atornerluisuunermik ajornartorsiuteqarnerup annertulluinnarnera taamaammallu atornerluisuuneq akiorniarlugu immikkut iliuuseqarnissamik pisariaqartitsisoqarnera. Oqaluuserissallugit tunuarsimaarfigineqartarsimasut tassaanerupput sumiginnaasoqarneranik eqqugaasimaneq, kinguaassiutitigut kanngutsaatsuliorfigineqarneq aammalu atornerlugaaneq, ilaqtariinni annersaanerit imigassamillu ajornartorsiuteqarneq, taakkulu malitsigisaanik inuit peroriartornermini eqqugaasimasut namminneq arlaatigut atornerluisunngorsimasarneri.



~~Qujanartumik inoqaterpassuaqarpugut nukissaqarluarlutik inoqatiminnut atonerluinermik ajornartorsiuteqartunut tapersersuillutillu katsorsaasinnaarusuttunik, pissutsilli ullumikkutut itsillugit, katsorsaasinnaanermik ilinniagaqarneq aatsaat nunarput qimaqqaarlugu, tassa Danmarkimi nunaniluunniit allani ingerlanneqarsinnaasarpoq.~~

ATASSUT-mi isumaqarpugut, nunatsinni katsorsaanermik ilinniarfeqalernissaanut amerlasuutigut pissutissaqarluartoq, ilaatigut tamanna pisinnaavoq ilinniarfiit pioreersut attuumassuteqartullu annertusaavigineqarnerisigut.

Takorloorparput ilinniartitaaneq inunnik isumaginninnermik aallaaveqartinneqassasoq, ilinniartitaanerlu ilisarnaateqassasoq pilersaarusiorneqartassasorlu atuagarsornikkut siammasissumik tunngaveqartumik, taamaattorli aamma Kalaallit Nunaanni katsorsaanermik ingerlataqarnermut naapertuuttumik aaqqissugaassasoq.

Katsorsaanermik ilinniarnaq aqputigalugu ilinniagaqartut piukkunnarsassapput ilaatigut siunnerfilimmik inuttut misilittagaat tunngavigalugit qaffasissumik pitsaassusilimmik atonerluisunut sullissinissaminnut sakkusaqarluartut. Tamatuma saniatigut takorloorparput tunngaviumik perorsaanermik, tarnip pissusiinik aammalu inoqatigiit akornanni pissutsinik ilinniartinneqassasut tamatumalu ilutigisaanik katsorsaanermi periaatsit nunani allani atorneqartut isumassarsiorfigineqartassasut takorloorparput.

ATASSUT-mut pingaaruteqarpoq matumani erseqqissassallugu nunatsinni atonerluisunut katsorsaanermik ilinniarfeqalernissaanik periaatsimut aalajangersimasumut ilinniarfiup pituttorneqarnissaa siunnersuuteqarnitsinni siunertarinnginnatsigu, paarlattanilli katsorsaariaatsit assigiinngitsut isumassarsiorfigalugit nunatsinni ilinniartitaanerup inuiaqatigiinnut kalaallinut tulluarsagaanissaa siunertarigatsigu.

Siunnersuutip suliarineqarneranut atatillugu ATASSUT-mit misissoraluarparput katsorsaasussanik ilinniartitsinermut aningaasartuutaasartut ullumikkut qanoq amerlatiginersut, tamannali iluatsinngilarput, taamaattorli naatsorsuutigaarput siunnersuutip ataatsimiititaliamit suliarineqarneratigut aningaasartuutaasussat qulaajaaffigilluarneqassasut.

Taamatut tunngavilersuuteqarluta siunnersuut Inatsisartunut suliasanngortipparput.